

WCA ta recorda Life Member Benjamina “Bea” Kock

SRA. Bea tabata un fiel miembro di Women’s Club of Aruba (WCA) pa decadanan y a cumpli cu tur e rekisitonan di nos club.

Bea a drenta WCA durante aña fiscal 1971-1972 y tabata asisti na tur reunion general cada luna, manera tabata na su alcance.

Bea a traha den varios comision cu tabata tin e temponan aya, cu tabata bastante mas di loke nos tin awendia. Su prioridad tabat’e comision di Welfare, cu tabata bishita nos grandinan, haci proyectonan pa entretene nos hendenan special, organisa varios fiesta pa celebra dianan recordatorio tanto nacional como mundial na Imeldahof y of Casa Cuna. Hiba clientenan di FADA riba day trip y trata di yuda nan cu algun manualidad, laga nan toca instrument y canta cancionnan popular. Tambe bishita enfermonan den hospital, combersa y haci oracion cu e grandinan, lesa buki cu nan y conta storia n’e muchanan cu tabata sufri di un of otro malesa.

Bea a dedica su tempo na traha cuminda, sopi, bolo y cos dushi pa bende na nos proyectonan pa recauda fondo, manera entre otro n’e Food Carousel na Wilhelmina Stadion di antes. El a participa den e comision di Safe the Earth “Tene Aruba Limpi” pa haci limpi na diferente parti di nos isla. Y pa nos Christmas Bazaar, Bea tabata bin cu mannan yen di obranan di man y donacionnan pa haci e Bazaar un exito aña tras aña y tabata un ehempel sigur den WCA p’esnan cu a join miembresia despues di dje.

Despues cu Bea tabata un miembro fiel pa 40 aña largo, WCA a reconoc’e como un Life Member na maart di 2014, unda a entrega Bea e certificado correspondiente y un bouquet di flor bao hopi aplauso di miembro-, invitado- y famianan presente n’e reunion general.

Bea tabata forma parti di e grupo di miembro di San Nicolas cu a y te ainda ta cumpli fielmente cu nan Club Stima!

Ta p’esey, cu nos curason yen di tristesa nos ta aki como fellow members pa tuma despedida di nos kerida Bea, kende ya a bay descansa den brasa di Señor. Ayo Bea stima, te despues!

Na su yiunan, Pierre y Loida, su nieta stima Marion, kende tambe ta miembro di WCA pa sigui cu Bea su legado y su nieto stima Jean Pierre, nos mas sincero condolencia, forsa pa boso por pasa den e temporada di tristesa ora boso ta haya falta di boso ser keri. Laga su bunita recuerdonan sirbi como un consuelo pa boso. Cu nos Bea stima, sosega na paz!

